

Pinerluuteqarsimasunik Isumaginnittoqarfiup paaqqinniffiutaani parnaarussanut oqartussaaqataatitsineq pillugu nalunaarut (oqartussaaqataatitsinermik nalunaarut)

Kalaallit Nunaanni pinerluttulerinermi inatsimmi § 204, imm. 3 aamma § 213, imm. 2 naapertorlugit, tak. inatsit nr. 306, 30. april 2008-meersoq, aalajangersarneqarpoq:

§ 1. Parnaarussat paaqqinniffimmi inuunermik oqartussaaqataaffiginissaanut periarfissaqartinneqassapput.

§ 2. Paaqqinniffik parnaarussanik oqartussaaqataatitsinissamut pisariaqartunik periarfissarsiuussissaaq.

§ 3. Paaqqinniffik parnaarussanik tamanik imaluunniit parnaarussanik eqimattakkaanik ataatsimeeqateqartarsinnaavoq.

Imm. 2. Pissutsit immikkut ittut tamanna ilalernartippassuk, paaqqinniffik parnaarussanik tamanik imaluunniit parnaarussanik eqimattakkaanik oqalliseqatiserinnissaaq, parnaarussat oqaaseqartartussanik toqqaasimangippata.

Imm. 3. Paaqqinniffik aamma oqalliseqatigineqassaaq, tamanna oqaaseqartartuutitanit noqqaassutigineqarpat.

Imm. 4. Parnaarussat oqaaseqartartuutitanik toqqaasimangippata paaqqinniffiup taamaaliornissamik periarfissaqarnera allagarsiinikkut assingusutigulluunniit parnaarussanut ilisimatitsissutigissavaa, tak. § 4.

Imm. 5. Paaqqinniffik oqalliseqatigiinnerit pillugit allagaqaasiortassaaq.

§ 4. Parnaarussat oqaaseqartartuutitassaminnik ataatsimik arlalinnilluunniit toqqaanissaminnut periarfissaqartinneqassapput.

Imm. 2. Parnaarussaq kinaluunniit oqaaseqartartuutitatu qinerneqarsinnaavoq. Parnaarussat tamarmik imaluunniit oqaaseqartartuutitatu ataatsimut oqaaseqartartuutitassamik toqqaasinnaatitaapput. Oqaaseqartartuutitassanik aamma ataatsimut oqaaseqartartuutitassamik qinersineq allakkatigut isertuussamik taasinikkut pisassaaq, paaqqinniffiup sinniisaatitaannit parnaarussallu sinniisaatitaannit ataatsimoortumik nakkutigineqarluni.

Imm. 3. Oqaaseqartartuutitaq paaqqinniffiup soraarsissinnaangilaa.

Imm. 4. Oqaaseqartartuutitatu tamarmik immikkut sinniisissaannik aamma toqqaasoqartassaaq, oqaaseqartartuutitaq pisinnaajunnaartillugu taassumatut piginnaatitaaffeqarlutillu pisussaaffeqartussanik.

Imm. 5. Paaqqinniffik oqaaseqartartuutitanik toqqaarneqarsimasunik akuttunngitsumik oqalliseqatiserinnittassaaq.

Imm. 6. Paaqqinniffimmik aamma oqalliseqateqartoqassaaq, tamanna oqaaseqartartuutitanit noqqaassutigineqarpat.

Imm. 7. Paaqqinniffik oqalliseqatigiinnerit pillugit allagaqaasiortassaaq.

§ 5. Paaqqinniffiup ilaatigut isummerfigisassavaa oqaaseqartartuutitassanik qanoq akulikitsigisumik qinersisoqartassasoq aamma oqaaseqartartuutitassanik immaqalu ataatsimut oqaaseqartartuutitassamik qinersineq qanoq ingerlanneqartassasoq kiisalu qinersinerit tamakku qanoq nakkutigineqartassasut.

§ 6. Torersuutitsinissamik isumannaatsuutitsinissamillu soqutigisaqarnerup tamanna ilalernartippagu, paaqqinniffik oqaaseqartartuutitaasup, matumani eqqarsaatigineqarlunittaaq ataatsimut oqaaseqartartuutitaq, parnaarussaqaqatiminik attaveqarsinnaatitaaneramik killiliisinnaavoq, parnaarussaqaqat inimi kisimiititaalluni inissinneqarsimatillugu.

§ 7. Oqaaseqartartuutitat atortassavaat piffissaq, oqaaseqartartuutitaanerup illersorneqarsinnaasumik suliarineqarnissaanut pisariaqartoq, parnaarussat sinniisaaffigineqartut amerlassusaat najukkamilu pissutsit isiginiarlugit. Suliarisassarli aqqissuunneqassaaq sulisinnaatitaanermut sulisussaataaannermullu, pinerluttulerinermi inatsisip § 210-iani, imm. 1-ip malitsigisaanut, annikinnerpaamik akornusiisussanngortillugu.

Imm. 2. Oqaaseqartartuutitat, oqaaseqartartuutitaanertik pissutigalugu sulinngitsut, akissarsitinneqassapput pinerluttulerinermi inatsimmi § 212, imm. 1 aamma suliaqartarnermik nalunaarummi malittarisassat malillugit.

§ 8. Nalunaarut atuutilersinneqarpoq ulloq 1. januar 2010.

Kalaallit Nunaanni Pinerluuteqarsimasunik Isumaginnittoqarfik, ulloq 7. december 2009

THOMAS NICOLAJSSEN